

朱子語類



朱子語類卷第十六


大學三

傳一章釋明明德

問克明德曰德之明與不明只在人之克與不克耳克只是具箇會明其明德節

問明德明命曰便是天之所命謂性者人皆有此明德但為物欲之所昏蔽故暗塞爾當

自人受之喚做明德自天言之喚做明命今人多鶻鶻突突一似無這箇明命若常見其在前面則凜凜然不敢放肆見許多道理都在眼前又曰人之明德即天之明命雖則是形骸間隔然人之所以能視聽言動非天而何問苟日新日日新曰這箇道理未見得時若無頭無面如何下工夫纔別撥得有此通透處便須急急躡躡趨鄉前去又曰周雖舊邦其命維新文王能使天下無一民不新其德即此便是天命之新又



云天視自我民視天聽自我民聽或問此若有不同如何曰
天豈曾有耳目以視聽只是自我民之視聽便是天之視聽
如帝命文王豈天諄諄然命之只是文王要恁地便是理合
恁地便是帝命之也又曰若一件事民人皆以為是便是天
以為是若人民皆歸往之便是天命之也又曰此處甚微故
其理難看質粹

顧諟天之明命是詳審顧諟見得子細個

顧諟天之明命只是照管得那本明底物事在意

顧諟天之明命便是常見這物事不教昏着今看大學亦要識

此意所謂顧諟天之明命無他求其放心而已方好

先生問顧諟天之明命如何看答云天之明命是天之所以命
我而我之所以為德者也然天之所以與我者雖曰至善苟
不能常提撕省察使大用全體昭晰無遺則人欲益滋天理
益昏而無以有諸己矣曰此便是至善但今人無事時又却

恁昏昏地至有事時則又隨事逐物而去都無一箇主宰這
須是常加省察真如見一箇物事在裏不要昏濁了他則無
事時自然凝定有事時隨理而處無有不當道夫

顧諟天之明命古註云常自在之說得極好非謂有一物常在
目前可見也只是長存此心知得有這道理光明不昧方其
靜坐未接物也此理固湛然清明及其遇事而應接也此理
亦隨處發見只要人常提撕省察念念不忘存養父之則是
理愈明雖欲忘之而不可得矣孟子曰學問之道無他求其
放心而已矣所謂求放心只常存此心便是存養既又自然
信向決知堯舜之可為聖賢之可學如菽粟之必飽布帛之
必煖自然不為外物所勝若是若存若亡如何會信如何能
必行又曰千書萬書只是教人求放心聖賢教人其要處皆
一苟通得一處則觸處皆通矣備
問顧諟天之明命言常自在之如何曰顧諟是看此也自在是

如目存之常知得有此理不是親眼看立則見其參於前在
輿則見其倚於衡便是這模樣只要常常提撕在這裏莫使
他昏昧了子常見得孝父常見得慈與國人交常見得信高
問顧謂常自在之天命至微恐不可自在之想只是顧其發見
處曰只是見得長長地在面前模樣立則見其參於前在輿
則見其倚於衡豈是有物可見義剛

問常自在之意先生以手指曰如一件物在此惟恐人偷去兩
眼常常覷在此相似支仁

問如何自在之曰常在視瞻之間蓋言存之而不忘寓

因說天之明命曰這箇物事即是氣便有許多道理在裏人物
之生都是先有這箇物事便是天當初分付底既有這物事
方始具是形以生便有皮包裹在裏若有這箇無這皮殼亦
無所包裹如草木之生亦是有箇生意了便會生出芽蘗芽
蘗出來便有皮包裹着而今儒者只是理會這箇要得順性

命之理佛老也只是理會這箇物事老氏便要常把住這氣
不肯與他散便會長生又視長生又視也未見得只是做得
到也便未會死佛氏也只是見箇物事便放得下所以死生
禍福都不動只是他去作弄了又曰各正性命保合大和聖
人於乾卦發此兩句最好人之所以為人物之所以為物都
是正箇性命保合得箇和氣性命便是當初合下分付底保
合便是有箇皮殼包裹在裏如人以及破其腹此箇物事便
散却便死夔孫

而今人會說話行動凡百皆是天之明命人心惟危道心惟微
也是天之明命夔孫

傳二章釋新民

苟日新一句是為學入頭處而今為學且要理會苟字苟能日
新如此則下面兩句工夫方能接續做去而今學者只管要
日新却不去苟字上面着工夫苟日新苟者誠也冰

苟誠也要緊在此一字實務

苟日新須是真箇日新方可日日新又日新

舊來着大學日新處以為重在後兩句今看得重在前一句苟

字多訓誠字

苟字訓誠古訓釋皆如此乍看覺差異人誠能有日新之功則須日有進益若暫能日新不能接續則前日所新者却間斷衰頹了所以不能日日新又日新也人傑

苟日新新是對舊自染之汙而言日日新又日新只是要常常如此無間斷也新與舊非是去外面討來昨日之舊乃是今日之新道夫云這正如孟子操存舍亡說存與亡非是有兩物曰然只是在一念間爾如顧諟天之明命上下文都說明德這裏却說明命蓋天之所以與我便是明命我之所得以為性者便是明德命與德皆以明為言是這箇物本自光明顯然在裏我却去昏蔽了他須用日新說得來又只是箇存心

所以明道云聖賢千言萬語莫欲人將已放之心約之使反復入身來自能尋向上去下學而上達也道夫

湯日日新書云終始惟一時乃日新這箇道理須是常接續不已方是日新才有間斷便不可盤銘取沐浴之義蓋為早間盥濯才了晚下垢汚又生所以常要日新德明

徐仁父問湯之盤銘曰日日新繼以作新民日新是明德事而今屬之作新民之上意者申言新民必本於在我之自新也曰然莊子言語道而非其序則非道矣橫渠云如中庸之字直須句句理會過使其言互相發今讀大學亦然其年十七八時讀中庸大學每早起須誦十遍今大學可且熟讀實孫鼓之舞之之謂作如擊鼓然自然使人跳舞踴躍然民之所以感動者由其本有此理上之人既有以自明其明德時時提撕警策則下之人觀瞻感發各有以興起其同然之善心而不能已耳

不能已耳

周雖舊邦其命維新自新新民而至於天命之改易可謂極矣
必如是而後為止於至善也個

其命維新是新民之極和天命也新大雅

傳三章釋止於至善

緝蠻黃鳥止于丘隅物亦各尋箇善處止可以人而不如鳥乎

告明

於緝熙敬止緝熙是工夫敬止是功效收殺處寓

或言大學以知止為要曰如君便要止於仁臣便要止於敬子

便止於孝父便止於慈若不知得何緣到得那地位只這便

是至善處道夫問至善是無過不及恰好處否曰只是這夾

界上些子如君止於仁若依違牽制懦而無斷便是過便不

是仁臣能陳善閉邪便是敬若有所畏懼不敢正君之失便

是過便不是敬道夫

問至善如君之仁臣之敬父之慈子之孝者固如此就萬物中

細論之則其類如何曰只恰好底便是坐如尸便是坐恰好

底立如齊便是立恰好底齊同

周問注云究其精微之蘊而又推類以通其餘何也曰大倫有

五此言其三蓋不止此究其精微之蘊是就三者裏面窮究

其蘊推類以通其餘是就外面推廣如夫婦兄弟之類窮

云須是就君仁臣敬子孝父慈與國人信上推究精微各無

不盡之理此章雖人倫大目亦只舉得三件必須就此上推

問如切如磋者道學也如琢如磨者自脩也此是詩人美武公

之本旨耶姑借其詞以發學問自脩之義邪曰武公大段是

有學問底人抑之一詩義理精密詩中如此者甚不易得聯

至善一章工夫都在切磋琢磨上聯

既切而復磋之既琢而復磨之方止於至善不然雖善非至也

傳之三章緊要只是如切如磋如琢如磨如切可謂善矣又須

當礎之方是至善如琢可謂善矣又須當磨之方是至善一章主意只是說所以止於至善工夫為下不可諱兮之語拖帶說到道成德至善民不能忘又因此語一向引去大槩是反覆嗟咏其味深長他經引詩或未甚切只大學引得極細密賀孫

魏元壽問切磋琢磨之說曰恰似剝了一重又有一重學者做工夫消磨舊習幾時便去教盡須是只管磨礪教十方淨潔最怕如今於眼前道理略理會得此便自以為足更不着力向上去這如何會到至善田地賀孫

骨角却易開解玉石儘着得磨指工夫賀孫

瑟矜莊貌問武貌恂慄嚴毅貌古人直是如此嚴整然後有那威儀烜赫著見德明

問解瑟為嚴密是就心言抑就行言曰是就心言問心如何是密處曰只是不龐疎恁地縝密密

問武毅之貌能剛強卓立不如此怠惰闕備

問瑟者武毅之貌恂慄戰懼之貌不知人當戰懼之時果有武毅之意否曰人而懷戰懼之心則必齋莊嚴肅又烏可犯

問恂慄何以知為戰懼曰莊子云木處則恂慄危懼廣

大率切而不磋亦未到至善處琢而不磨亦未到至善處瑟兮

問兮則誠敬存於中矣未至於赫兮烜兮威儀輝光著見於外亦未為至善此四句是此段緊切處專是說至善蓋不如

此則雖善矣未得為至善也至於民之不能忘若非十分至善何以使民久而不能忘古人言語精密有條理如此

民之不能忘也只是一時不忘亦不是至善又曰瑟兮矜兮赫兮謹兮者有所主於中而不能發於外亦不是至善務飾於

外而無主於中亦不是至善錄

問前王不忘云云曰前王遠矣盛德至善後人不能忘之君子

賢其賢如堯舜文武之德後世尊仰之豈非賢其所賢乎親

其親如周后稷之德子孫宗之以為先祖先父之所自出豈非親其所親乎寓

問君子賢其賢而親其親曰如孔子仰文武之德是賢其賢成康以後思其恩而保其基緒便是親其親木之

或問至善章曰此章前三節是說止字中一節說至善後面烈文一節又是咏歎此至善之意錄

傳四章釋本末

問聽訟吾猶人也必也使無訟乎曰固是以脩身為本只是公別底言語多是作如云凡人聽訟以曲為直以直為曲所以人得以盡其無實之辭聖人理無不明無不燭所以人不敢如此却是聖人善聽訟所以人不敢盡其無實之辭正與經意相反聖人正是說聽訟我也無異於人當使其無訟之可聽方得若如公言則當云聽訟吾過人遠矣故無情者不敢盡其辭始得聖人固不會錯斷了事只是它所以無訟者

却不在於善聽訟在於意識心正自然有以薰炙漸染大服

民志故自無訟之可聽耳如成人有其死而不為衰者聞

子臯將至遂為衰子臯何嘗聽訟自有以感動人處耳個

使他無訟在我之事本也恁地看此所以聽訟為末冰

無情者不得盡其辭便是說那無訟之由然惟先有以服其心

志所以能使之不得盡其虛誕之辭義剛

大畏民志者大有以畏服斯民自欺之志卓

傳五章釋格物致知

劉圻父說人心之靈莫不有知而天下之物莫不有理恐明明德便是性曰不是如此心與性自有分別靈底是心實底是性靈便是那知覺底如向父母則有那孝出來向君則有那忠出來這便是性如知道事親要孝事君要忠這便是心張子曰心統性情者也此說得最精密次日圻父復說過先生曰性便是那理心便是盛貯該載敷施發用底間表裏精粗

無不到曰表便是外面理會得底裏便是就自家身上至親
至切至隱至密貼骨貼肉處今人處事多是自說道且恁地
也不妨這箇便不是這便只是理會不曾到那貼底處若是
知得那貼底時自是快然不肯恁地了義剛
子襄同

問因其已知之理推而致之以求至乎其極是因定省之孝以
至於色難養志因事君之忠以至於陳善閉邪之類否曰此
只說得外面底須是表裏皆如此若是做得大者而小者未
盡亦不可做得小者而大者未盡尤不可須是無分毫欠闕
方是且如陸子靜說良知良能四端根心只是他弄這物事
其他有合理會者渠理會不得却禁人理會鵝湖之會渠作
詩云易簡工夫終久大彼所謂易簡者苟簡容易爾全看得
不子細乾以易知者乾只是至健之物至健者要做便做直是
易坤是至順之物順理而為無所不能故曰簡此言造化之
理至於可以則賢人之德德可以久者日新而不已可大則賢人

之業可大者富有而無疆易簡有幾多事在豈容易苟簡之

云乎人傑

任道弟問致知章前說窮窮理處云因其已知之理而益窮之且
經文物格而後知至却是知至在後今乃云因其已知而益
窮之則又在格物前曰知元自有纔要去理會便是這些知
萌露若懵然全不向着便是知之端未曾通纔思量着便這
箇骨子透出來且如做此事錯纔知道錯便是向好門路却
不是方始去理會箇知只是如今須着因其端而推致之使
四方八面千頭萬緒無有些不知無有豪髮窒礙孟子所謂
知皆廣而充之若火之始然泉之始達廣而充之便是致字

意思賀孫

致知則理在物而推吾之知以知之也知至則理在物而吾心
之知已得其極也或問理之表裏精粗無不盡而吾心之
別取舍無不切既有箇定理如何又有表裏精粗曰理固自

有表裏精粗人見得亦自有高低淺深有人只理會得下面許多都不見得上面一截這喚做知得表知得粗又有人合下便看得大體都不就中間細下工夫這喚做知得裏知得精二者都是偏故大學必欲格物致知到物格知至則表裏精粗無不盡賀孫

或問表裏精粗曰須是表裏精粗無不到有一種人只就皮殼一做功夫却於理之所以然者全無是處又有一種人思慮向裏去又嫌眼前道理粗於事物上都不理會此乃談玄說妙之病其流必入於異端錄

問表裏曰表者人物之所共由裏者吾心之所獨得表者如父慈子孝雖九夷八蠻也出這道理不得裏者乃是至隱至微至親至切切要處因舉子思云語大天下莫能載語小天下莫能破又說裏字云莫見乎隱莫顯乎微此箇道理不惟一日間離不得雖一時間亦離不得以至終食之頃亦離不得

夔孫

傳問表裏之說曰所說博我以文約我以禮便是博我以文是要四方八面都見得周匝無遺是之謂表至於約我以禮又要逼向身上來無一毫之不盡是之謂裏子升云自古學問亦不過此二端曰是但須見得通透木之

問精粗曰如管仲之仁亦謂之仁此是粗處至精處則顏子三月之後或違之又如充無欲害人之心則仁不可勝用充無欲穿窬之心則義不可勝用害人與穿窬固為不仁不義此是粗底然其實一念不當則為不仁不義處夔孫

周問大學補亡心之分別取舍無不切曰只是理徹了見善端的如不及見不善端的如探湯好善便端的如好好色惡不善便端的如惡惡臭此下須連接誠意看此未是誠意是醞釀誠意來淳○謨錄云此只是連着誠意說知之者切實見善真如不及見不善真如探湯而無纖毫之實李問吾之所知無不切曰某向說得較寬又覺不切今說較切

又少此寬舒意所以又說道表裏精粗無不盡也自見得切字却約向裏面賀孫

安卿問全體大用曰體用元不相離如人行坐坐則此身全坐便是體行則此體全行便是用道夫

問格物章補文處不入敬意何也曰敬已就小學處做了此處只據本章直說不必雜在這裏壓重了不淨潔寓

問所補致知章何不效其文體曰亦曾效而為之竟不能成劉原父却會效古人為文其集中有數篇論全似禮記必大

傳六章釋誠意

誠其意只是實其意只作一箇虛字看如正字之類端蒙

說許多病痛都在誠意章一齊格物了下面有此小為病痛亦輕可若不除去恐因此滋蔓則病痛自若泳

問誠意是如何曰心只是有一帶路更不着得兩箇物事如今人要做好事都自無力其所以無力是如何只為他有箇為

惡底意思在裏面牽繫要去做好事底心是實要做了好事底心是虛被那虛底在裏夾雜便將實底一齊打壞了賀孫

請學升堂

云云

教授請講說大義曰大綱要緊只是前面三兩

章君子小人之分却在誠其意處誠於為善便是君子不誠底便是小人更無別說琮

器遠問物格知至了如何到誠意又說毋自欺也毋者禁止之

辭曰物既格知既至到這裏方可着手下工夫不是物格知至了下面許多一齊掃了若如此却不消說下面許多看下

面許多節節有工夫賀孫

自欺

亞夫問欲正其心者先誠其意此章當說所以誠意工夫當如何曰此繼於物格知至之後故特言所謂誠其意者毋自欺也若知之已至則意無不實惟是知之有豪末未盡必至於自欺且如做一事當如此決定只着如此做而不可以如彼若知之未至則當做處便夾帶這不當做底意在當如此做

又被那要如彼底心牽惹這便是不實便都做不成賀孫
問知不至與自欺者如何分曰小人間居為不善無所不至見
君子而後厭然揜其不善而著其善只為是知不至耳問當
其知不至時亦自不知其至於此然其勢必至於自欺曰勢
必至此頃之復曰不識不知者却與此又別論他箇又却只
是見錯故以不善為善而不自知耳其與知不至而自欺者
固是五十步笑百步然却又別問要之二者其病源只是欠
了格物工夫曰然道夫

問劉棟看大學自欺之說如何曰不知義理却道我知義理是
自欺先生曰自欺是箇半知半不知底人知道善我所當為
却又不十分去為善知道惡不可作却又是自家所愛舍他
不得這便是自欺不知不識只喚做不知不識却不喚做自
欺道夫

或問誠其意者毋自欺曰譬如一塊物外面是銀裏面是鐵便

是自欺須是表裏如一便是不自欺然所以不自欺須是
得分曉譬如今人見鳥喙之不可食知水火之不可蹈則自
不食不蹈如寒之欲衣飢之欲食則自是不能已今人果見
得分曉如鳥喙之不可食水火之不可蹈見善如飢之欲食
寒之欲衣則此意自實矣祖道

自欺非是心有所慊外面雖為善事其中却實不然乃自欺也
譬如一塊銅外面以金裹之便不是真金人傑

所謂誠其意者毋自欺也注云心之所發陽善陰惡則其好善
惡惡皆為自欺而意不誠矣而今說自欺未說到與人說時
方謂之自欺只是自家知得善好要為善然心中却覺得微
有此沒緊要底意思便是自欺便是虛偽不實矣正如金已
是真金了只是鍛煉得微不熟微有此查滓去不盡顏色或
白或青或黃便不是十分精金矣顏子有不善未嘗不知便
是知之至知之未嘗復行便是意之實又曰如顏子地位豈

有不善所謂不善只是微有差失便能知之才知之便更不
萌作只是那微有差失便是知不至處間

所謂自欺者非爲此人本不欲爲善去惡但此意隨發常有一
念在內阻隔住不放教表裏如一便是自欺但當致知分別
善惡了然後致其謹獨之功而力割去物欲之雜而后意可
得其誠也壯祖

只今有一豪不快于心便是自欺也道夫

看如今未識道理人說出道理便恁地包藏隱伏他元不曾見
來這亦是自欺亦是不實想他當時發出來心下必不安穩

賀

國子學誠意看來有三樣一則內全無好善惡惡之實而
直直掩覆於外者此不誠之尤也一則雖知好善惡惡之爲
是而隱微之際又苟且以自瞞底一則知有未至隨意應事
而自不覺陷於自欺底曰這箇不用恁地分只是一路都是

自欺但有深淺之不同耳壽

次早云夜來國秀說自欺有三樣底後來思之是有這三樣意
思然却不是三路只是一路有淺深之不同又因論以假託
換掩覆字云假託字又似重了掩覆字又似輕不能得通上
下底字又因論誠與不誠不特見之於外只裏面一念之發
便有誠僞之分譬如一粒粟外面此皮子好裏面那些子不
好如某所謂其好善也陰有不好者以拒於內其惡惡也陰
有不惡者以挽其中蓋好惡未形時已有那些子不好不惡
底藏在裏面了壽

人固有終身爲善而自欺者

不特外面有心中欲爲善而常須
有箇不肯底意思便是自欺也須

是要打疊得盡蓋意誠而後心可正過得這一關後方可進講

問自慊曰人之爲善須是十分真實爲善方是自慊若有六七
分爲善又有兩三分爲惡底意思在裏面相牽便不是自慊
須是如惡惡臭好好色方是自慊

如惡惡臭如好好色此之謂自慊慊者無不足也如有心為善更別有一分心在主張他事即是橫渠所謂有外之心不可以合天心也祖道

自慊之慊大意與孟子行有不慊相類子細思之亦微有不同孟子慊訓滿足意多大學訓快意多橫渠云有外之心蜀蘇作自慊不足以合天心初看亦只一般然橫渠亦是訓足底意思多大學訓快意多問大學說自慊且說合做處便做無牽滯於己私且只是快底意少問方始心下充滿孟子謂行有不慊只說行有不滿足則便餒耳曰固是夜來說此極子細若不理會得誠意思親切也說不到此今看來誠意如惡惡臭如好好色只是苦切定要如此不如此自不得賀孫字有同一義而二用者慊字訓足也吾何慊乎哉謂心中不以彼之富貴而懷不足也行有不慊於心謂義須充足於中不然則餒也如忍之一字自容忍而為善者言之則為忍去忿

慾之氣自殘忍而為惡者言之則為忍了惻隱之心慊字一從口如胡孫兩慊皆本虛字看懷藏何物於內耳如銜字或為銜恨或為銜恩亦同此義當

誠意章皆在兩箇自字上用功人傑曰自

問毋自欺是誠意自慊是意誠否小人間居以下是形容自欺

之情狀心廣體胖是形容自慊之意否曰然後段各發明前說但此處是箇牢關今能致知知至而意識矣驗以日用間誠意十分為善矣有一分不好底意思潛發以間於其間此意一發便由斜徑以長這箇却是實前面善意却是虛矣如見孺子入井救之是好意其間有些要譽底意思以雜之如薦好人是善意有些要人德之之意隨後生來治惡人是好意有此狼疾之意隨後來前面好意都成虛了如垢卦上五爻皆陽下面只一陰生五陽便立不住了荀子亦言心卧則夢偷則自行使之則謀見解蔽篇彼言偷者便是說那不好底意

若曰使之則謀者則在人使之如何耳謀善謀惡都由人只是那偷底可惡故須致知要得早辨而豫戒之耳大雅

或問自慊自欺之辨曰譬如作蒸餅一以極白好麵自裏包出內外更無少異所謂自慊也一以不好麵做心却以白麵作皮務要欺人然外之白麵雖好而易窮內之不好者終不可揜則乃所為自欺也壯相

問誠其意者毋自欺也近改注云自欺者心之所發若在於善而實則未能不善也若字之義如何曰若字只是外面做得來一似都善其實中心有些不愛此便是自欺前日得孫敬甫書他說自慊字似差了其意以為好善如好好色惡惡如惡惡臭如此了然後自慊看經文語意不是如此此之謂自慊謂如好好色惡惡臭只此便是自慊是合下好惡時便是要自慊了非是做得善了方能自慊也自慊正與自欺相對不差豪髮所謂誠其意便是要毋自欺非至誠其意了方能

不自欺也所謂不自欺而慊者只是要自快足我之志願不是要為他人也誠與不誠自慊與自欺只爭這些子豪髮之間耳又曰自慊則一自欺則二自慊者外面如此中心也是如此表裏一般自欺者外面如此做中心其實有些子不願外面且要人道好只此便是二心誠偽之所由分也個

問誠意章曰過此關方得道理牢固或云須無一豪自欺方能自慊必十分自慊方能不自欺故君子必謹獨曰固是然欲誠其意者先致其知若未至何由得如此蓋到物格知至後已是誠意八九分了只是更就上面省察如用兵禦寇寇雖已盡翦除了猶恐林谷草莽間有小小隱伏者或能間出為害更當搜過始得銖

問知至而後意誠則知至之後無所用力意自誠矣傳猶有謹獨之說何也曰知之不至則不能謹獨亦不肯謹獨惟知至者見得實是實非灼然如此則必戰懼以終之此所謂能謹

獨也如顏子請事斯語曾子戰戰兢兢終身而後已彼豈知之不至然必如此方能意識蓋無放心底聖賢惟聖罔念作狂一豪少不謹懼則已墮於意欲之私矣此聖人教人徹上徹下不出一敬字也蓋知至而後意識則知至之後意已誠矣猶恐隱微之間有所不實又必提掇而謹之使無豪髮妄馳則表裏隱顯無一不實而自快慊也謹獨。問或言知至後煞要著力做工夫竊意致知是著力做工夫處到知至則雖不能無工夫然亦無大段着工夫處曰雖不用大段着工夫但恐其間不能無照管不及處故須着防閑之所以說君子謹其獨也行夫問先生常言知既至後又可以驗自家之意誠不誠先生久之曰知至後意固自然誠但其間雖無大段自欺不誠處然亦有照管不着所在所以貴於謹其獨至於有所未誠依舊是知之未真若到這裏更加工夫則自然無一豪之不誠矣道夫

光祖問物格知至則意無不誠而又有謹獨之說莫是當誠意時自當更用工夫否曰這是先窮得理先知得到了更須於微細處用工夫若不真知得到都恁地鶻鶻突突雖十目視十手指衆所共知之處亦自七顛八倒了更如何地謹獨知至而後意誠已有八分恐有照管不到故曰謹獨節致知者誠意之本也謹獨者誠意之助也致知則意已誠七八分了只是猶恐隱微獨處尚有此子未誠實處故其要在謹獨銖

誠意章上云必慎其獨者欲其自慊也下云必慎其獨者防其自欺也蓋上言如惡惡臭如好好色此之謂自慊故君子必慎其獨者欲其察於隱微之間必吾所發之意好善必如好好色惡惡必如惡惡臭皆以實而無不自慊也下言小人間居為不善而繼以誠於中形於外故君子必慎其獨者欲其察於隱微之間必吾所發之意由中及外表裏如一皆以實

而無少自欺也

誠意者好善如好好色惡惡如惡惡臭皆是真情既是真情則發見於外者亦皆可見如種麻則生麻種穀則生穀此謂誠於中形於外又恐於獨之時有不到處故必謹獨節

或說謹獨曰公自是看錯了如惡惡臭如好好色此之謂自慊已是實理了下面故君子必謹其獨是別舉起一句致戒又是一段工夫至下一段又是反說小人之事以致戒君子亦豈可謂全無所為且如着衣喫飯也是為飢寒大學看來雖只恁地滔滔地說去然段段致戒如一下水舟相似也要拖

要輯要孫

或問在謹獨只是欲無間先生應節

問誠意章句所謂必致其知方肯謹獨方能謹獨曰知不到田

地心下自有一物與他相爭鬪故不會肯謹獨

問自欺與厭然揜其不善而著其善之類有分別否曰自欺只

是於理上虧欠不足便胡亂且欺謾過去如有得九分義理雜了一分私意九分好善惡惡一分不好不惡便是自欺到得厭然揜著之時又其甚者原其所以自欺又是知不至不曾見得道理精至處所以向來說表裏精粗字如知為人子止於孝這是表到得知所以必着孝是如何所以為孝當如何這便是裏見得到這般處方知決定是着孝方可以用力於孝又方肯決然用力於孝人須是掃去氣稟私欲便曾次虛靈洞徹木之○論揜其不善以下

問意誠曰表裏如一便是但所以要得表裏如一却難今人當獨處時此心非是不誠只是不奈何他今人在靜處非是此心要馳騖驚但把捉他不住此已是兩般意思至如見君子而後厭然詐善時已是第二番罪過了祖道

誠意只是表裏如一若外面白裏面黑便非誠意今人須於靜坐時見得表裏有不如一方是有工夫如小人見君子則掩

其不善已足第二番過失人傑

此一箇心須每日提撕令常惺覺頃刻放寬便隨物流轉無復收拾如今大學一書豈在看他言語正欲驗之於心如何如好好色如惡惡臭試驗之吾心好善惡惡果能如此乎閒居為不善見君子則掩其不善而著其善是果有此乎一有不

至則勇猛奮躍不已必有長進處今不知為此則書自書我自我何益之有大雅

問誠於中形於外是實有惡於中便形見於外然誠者真實無妄安得有惡有惡不幾於妄乎曰此便是惡底真實無妄善便虛了誠只是實而善惡不同實有一分惡便虛了一分善實有二分惡便虛了二分善薄

誠於中形於外大學和惡字說此誠只是實字也惡者却是無了天理本然者但實有其惡而已方

凡惡惡之不實為善之不勇外然而中實不然或有所為而為

之或始勤而終怠或九分為善尚有一分苟且之心皆不實而自欺之患也所謂誠其意者表裏內外徹底皆如此無纖豪絲髮苟且為人之弊如飢之必欲食渴之必欲飲皆自以求飽足於已而已非為他人而食飲也又如一盆水徹底皆清瑩無一豪砂石之雜如此則其好善也必誠好之惡惡也必誠惡之而無一豪強勉自欺之雜所以說自慊但自滿足而已豈有待於外哉是故君子謹其獨非特顯明之處是如此雖至微至隱人所不知之地亦常謹之小處如此大處亦如此顯明處如此隱微處亦如此表裏內外精粗隱顯無不謹之方謂之誠其意字學子曰人能充無欲害人之心而仁不可勝用也夫無欲害人之心人皆有之閑時皆知惻隱及到臨事有利害時此心便不見了且如一堆金寶有人曰先爭得者與之自家此心便欲爭奪推倒那人定要得了方休又如人皆知穿窬之不可為雖稍有識者亦不肯為及至顛冥

於富貴而不知耻或無義而受萬鍾之祿便是到利害時有
時而昏所謂誠意者須是隱微顯明小大表裏都一致方得
孟子所謂見孺子入井時怵惕惻隱非惡其聲而然非為內
交要譽而然然却心中有內交要譽之心却向人說我實是
惻隱羞惡所謂為惡於隱微之中而詐善於顯明之地是所
謂自欺以欺人也然又豈可欺哉人之視己如見其肺肝然
則欺人者適所以自欺而已誠於中形於外那箇形色氣貌
之見於外者自別決不能欺人祇自欺而已這樣底永無緣
做得好人為其無為善之地也外面一副當雖好然裏面却
踏空永不足以為善永不濟事更莫說誠意正心脩身至於
治國平天下越沒干涉矣個○以下
全章之旨

問誠意章自欺注今改本恐不如舊注好曰何也曰今注云心
之所發陽善陰惡則其好善惡惡皆為自欺而意不誠矣恐
初讀者不曉又此句或問中已言之却不如舊注云人莫不

知善之當為然知之不切則其心之所發必有陰在於惡而
陽為善以自欺者故欲誠其意者無他亦曰禁止乎此而已
矣此言明白而易曉曰不然本經正文只說所謂誠其意者
毋自欺也初不曾引致知兼說今若引致知在中間則相牽
不了却非解經之法又况經文誠其意者毋自欺也這說話
極細蓋言為善之意稍有不實照管少有不到處便為自欺
未便說到心之所發必有陰在於惡而陽為善以自欺處若
如此則大故無狀有意於惡非經文之本意也所謂心之所
發陽善陰惡乃是見理不實不知不覺地陷於自欺非是陰
有心於為惡而詐為善以自欺也如公之言須是鑄私錢假
官會身為自欺大故是無狀小人此豈自欺之謂邪又曰所
欺者正當於幾微豪釐處做工夫只幾微之間少有不實便
為自欺豈待如此恨當至於陰在為惡而陽為善而後謂之
自欺邪此處語意極細不可草草看此處工夫極細未便說到那處所以前
後學者多說差了蓋為賺連下文小人間居為不善一段看

了所以差也又問今改注下文云則無待於自欺而意無不誠也據經文方說毋自欺毋者禁止之辭若說無待於自欺恐語意太快未易到此曰既能禁止其心之所發皆有善而無惡實知其理之當然使無待於自欺非勉強禁止而猶有時而發也若好善惡惡之意有一豪之未實則其發於外也必不能掩既是打疊得盡實於為善便無待於自欺矣如人腹痛畢竟是腹中有些冷積須用藥驅除去這冷積則其痛自止不先除去冷積而但欲痛之自止豈有此理個

敬子問所謂誠其意者毋自欺也注云外為善而中實未能免於不善之雜其意欲改作外為善而中實容其不善之雜如何蓋所謂不善之雜非是知早知得了又容著在這裏此之謂自欺曰不是知得了容著在這裏是不奈他何了不能不自欺公台下認錯了只管說箇容字不是如此容字又是第二節緣不奈他何所以容在這裏此一段文意公不曾識

得它源頭在只要硬去捺他所以錯了

大槩以為有纖豪不善之雜便是自欺

自欺只是自欠了分數恰如淡底金不可不謂之金只是欠了分數如為善有八分欲為有兩分不為此便是自欺是自欠了這分數或云如此則自欺却是自欠曰公且去看又曰自欺

非是要如此是不奈他何底

荀子曰心卧則夢偷則自行使之則謀某自

十六七讀時便曉得此意蓋偷心是不知不覺自走去底不由自家使底倒要自家去捉他使之則謀這却是好底心由自家使底李云其每常多是去捉他如在此坐心忽散亂又用去捉他曰公又說錯了公心麓都看這說話不出所以說格物致知而後意誠裏面也要知得透徹外面也要知得透徹便自是無那箇物事譬如果子爛熟後皮核自脫落離去不用人去咬得了如公之說這裏面一重不曾透徹在只是認得箇容著硬逼捺將去不知得源頭工夫在所謂誠其意者毋自欺也此是聖人言語之最精處如箇尖銳底物事如

公所說只似箇樁頭子都罷了公只是硬要去強捺如水恁地滾出來却硬要將泥去塞他如何塞得住又引中庸論誠處而曰一則誠雜則偽只是一箇心便是誠纔有兩箇心便是自欺好善如好好色惡惡如惡惡臭他徹底只是這一箇心所以謂之自慊若纔有些子間雜便是兩箇心便是自欺如自家欲為善後面又有箇人在這裏拗你莫去為善欲惡惡又似有箇人在這裏拗你莫要惡惡此便是自欺因引近有兩人焉欲為善云云如人說十句話九句實一句脫空那九句一段正是此意如人說十句話九句實一句脫空那九句實底被這一句脫空底都壞了如十分金徹底好方謂之真金若有三分銀便和那七分底也壞了又曰佛家看此亦甚精被他分析得項數多如云有十二因緣只是一心之發便被推尋得許多察得來極精微又有所謂流注想他最怕這箇所以為山禪師云其參禪幾年了至今不曾斷得這流注想此即荀子所謂偷則自行之心也個

次早又曰昨夜思量敬子之言自是但傷雜耳某之言却即說得那箇自欺之根自欺却是敬子容字之意容字却說得是蓋知其為不善之雜而又蓋底以為之此方是自欺謂如人有一石米却只有九斗欠了一斗此欠者便是自欺之根自家却自蓋底了嚇人說是一石此便是自欺謂如人為善他心下也自知有箇不滿處他却不說是他有不滿處却遮蓋了硬說我做的是這便是自欺却將那虛假之善來蓋覆這真實之惡某之說却說高了移了這位次了所以人難曉大率人難曉處不是道理有錯處時便是語言有病不是語言有病時便是移了這步位了今若只恁地說時便與那小人間居為不善處都說得貼了個

次日又曰夜來說得也未盡夜來歸去又思看來如好好色如惡惡臭一段便是連那母自欺也說言人之母自欺時便要如好好色如惡惡臭樣方得若好善不如好好色惡惡不如

惡惡臭此便是自欺毋自欺者謂如為善若有些子不善而自欺時便當斬根去之真箇是如惡惡臭始得如小人間居為不善底一段便是自欺底只是反說間居為不善便是惡惡不如惡惡臭見君子而後厭然掩其不善而著其善便是好善不如好好色若只如此看此一篇文義都貼實平易坦然無許多屈曲其舊說忒說闊了高了深了然又自有一樣人如舊說者欲節去之又可惜但終非本文之意耳個看誠意章有三節兩必謹其獨一必誠其意十目所視十手所指言小人間居為不善其不善形於外者不可掩如此德潤身心廣體胖言君子謹獨之至其善之形於外者證驗如此

問十目所視十手所指曰此承上文人之視已如見其肺肝底意不可道是人不知人曉然共見如此海○十目所視以目魏元壽問十目所視止心廣體胖處曰十目所視十手所指不

是怕人見蓋人雖不知而我已自知自是甚可皇恐乎其與十目十手所指何以異哉富潤屋以下却是說意誠之驗如此時舉

心廣體胖心本是關天底物事只是因愧作了便卑狹便被他隔礙了只見得一邊所以體不能得舒泰個

伊川問尹氏讀大學如何對曰只看得心廣體胖一句甚好又問如何尹氏但長吟心廣體胖一句尹氏必不會嚇人須是它自見得今人讀書都不識這樣意思

問尹和靖云心廣體胖只是樂伊川云這裏着樂字不得如何曰是不勝其樂德明

問心廣體胖曰無愧怍是無物欲之蔽所以能廣大指前面燈云且如此燈後面被一片物遮了便不見一半了更從此一邊用物遮了便全不見此屋了如何得廣大樂森

問誠意章結注云此大學一篇之樞要曰此自知至處便到誠

意兩頭截定箇界分在這裏此便是箇君子小人分路頭處
從這裏去便是君子從那裏去便是小人這處立得脚方是
在天理上行後面節目未是處却旋旋理會

居甫問誠意章結句云此大學之樞要樞要說誠意是說致知
曰上面關着致知格物下面關着四五項上須是致知能致
其知知之既至方可以誠得意到得意誠便是過得箇大關
方始照管得箇身心若意不誠便自欺便是小人過得這箇
關便是君子又云意誠便全然在天理上行意未誠以前尚
汨在人欲裏賀孫

因說誠意章曰若如舊說是使初學者無所用其力也中庸所
謂明辨誠意章而今方始辨得分明夔孫
讀誠意一章炎謂過此一關終是省事曰前面事由多自齊家
以下至治國則其事已多自治國至平天下則其事愈多只
是源頭要從這裏做去又曰看下章須通上章看可見炎

傳七章釋正心脩身

或問正心章說忿懣等語恐通不得誠意章曰這道理是一落
索纔說這一章便通上章與下章如說正心誠意便須通格
物致知說

大學於格物誠意章都是鍊成了到得正心脩身處都易了夔孫
問先生近改正心一章方包括得盡舊來說作意或未誠則有
是四者之累却只說從誠意去曰這事連而却斷斷而復連
意有善惡之殊意或不誠則可以爲惡心有得失之異心有
不正則爲物所動却未必爲惡然未有不能格物致知而能
誠意者亦未有不能誠意而能正心者人傑

或問正心誠意章先生令他說曰意識則心正曰不然這幾句
連了又斷斷了又連雖若不相粘綴中間又自相貫譬如一
竿竹雖只是一竿然其間又自有許多節意未誠則全體是
私意更理會甚正心然意雖誠了又不可不正其心意之誠

不誠直是有公私之辨君子小人之分意若不誠則雖外面
為善其意實具不然如何更問他心之正不正意既誠了而其
心或有所偏倚則不得其正故方可做那正心底工夫廣
亞夫問致知誠意曰心是大底意是小底心要恁地做却被意
從後面牽將去且如心愛做箇好事又被一箇意道不須恁
地做也得且如心要孝又有不孝底意思牽了所謂誠意者
譬如飢時便喫飯飽時便休自是實要如此到飽後又被人
請去也且胡亂與他喫此子便是不誠須是誠則自然表裏
如一非是為人而做求以自快乎已耳如飢之必食渴之必
飲無一豪不實之意這箇知至意誠是萬善之根有大底地
盤方立得脚住若無這箇都靠不得心無好樂又有箇不無
好樂底在後心無忿懣又有箇不無忿懣底在後知至後自
然無格

敬之問誠意正心誠意曰正去除得裏面許多私意正心是去除
得外面許多私意誠立息是檢察於隱微之際正心是體驗於
事物之間曰到得正心時節已是煞好了只是就好裏面又
有許多偏要緊最是誠意時節正是分別善惡最要着力所
以重複說道必謹其獨若打得這關過已是煞好了到正心
又怕於好上要偏去如水相似那時節已是淘去了濁十分
清了又怕於清裏面有波浪動蕩處賀孫
問意既誠而有憂患之類何也曰誠意是無惡憂患忿懣之類
却不是惡但有之則是有所動節

意既誠矣後面忿懣恐懼好樂憂患親愛賤惡只是安頓不著
在便是苟志於仁矣無惡也泳

問心體本正發而為意之私然後有不正今欲正心且須誠意
否未能誠意且須操存否曰豈容有意未誠之先且放他喜
怒憂懼不得其正不要管他直要意誠後心却自正如此則
意終不誠矣所以伊川說未能誠意且用執持大雅

誠意是真實好善惡惡無夾雜又曰意不誠是私意上錯了心
不正是公道上錯了又曰好樂之類是合有底只是不可留
滯而不消化無留滯則此心便虛節

問忿懣恐懼好樂憂患皆不可有否曰四者豈得皆無但要得
其正耳如中庸所謂喜怒哀樂發而中節者也去偽

心有喜怒哀樂則不得其正非謂全欲無此此乃情之所不能
無但發而中節則是發不中節則有偏而不得其正矣端蒙

好樂憂懼四者人之所不能無也但要所好所樂皆中理合當
喜不得不喜合當怒不得不怒節

四者人所不能無也但不可為所動若順應將去何不得其正
之有如顏子不遷怒可怒在物顏子未嘗為血氣所動而移

於人也則豈怒而心有不正哉端蒙
正心却不是將此心去正那心但存得此心在這裏所謂忿懣

恐懼好樂憂患自來不得智孫

問忿懣恐懼好樂憂患皆以有所為言則是此心之正不存而

是四者得以為主於內曰四者人不能無只是不要他留而
不去如所謂有所則是被他為主於內心反為他動也道夫

大學七章看有所二字有所憂患憂患是合當有若因此一事
而常留在胸中便是有所忿懣因人之有罪而撻之才撻

了其心便平是不有若此心常又不平便是有恐懼好樂亦
然泳

心有所忿懣則不得其正忿懣已自產了有事當怒如何不怒
只是事過便當豁然便得其正若只管忿怒滯留在這裏如

何得心正心有所好樂則不得其正如一箇好物色到面前
真箇是好也須道是好或留在這裏若將去了或是不當得

他底或偶然不得他底便休不可只管念念着他賀孫

問伊川云忿懣恐懼好樂憂患人所不能無者但不以動其心
既謂之忿懣憂患如何不牽動他心曰事有當怒當憂者但

過了則休不可常留在心顏子未嘗不怒但不遷耳因與梓
中果怒在此不可遷之於彼德明

心不可有一物喜怒哀樂固欲得其正然過後須平了且如人
有喜心若以此應物便是不得其正人傑

看心有所喜怒說曰喜怒哀樂固欲中節然事過後便須平了
謂如事之可喜者固須與之喜然別遇一事又將此意待之
便不得其正蓋心無物然後能應物如一量稱稱物固自得
其平若先自添著此物在上而以之稱物則輕重悉差矣心
不可有一物亦猶是也 當

四者心之所有但不可使之有所私爾纔有所私便不能化梗
在胸中且如忿懣恐懼有當然者若定要他無直是用死方
得但不可先有此心耳今人多是纔忿懣雖有可喜之事亦
所不喜纔喜雖有當怒之事亦不復怒便是蹉過事理了便
視而不見聽而不聞食而不知其味了蓋這物事纔私便不

去只管在胸中推盪終不消釋設使此心如太虛然則應接
萬務各止其所而我無所與則便視而見聽而聞食而真知
其味矣看此一段只是要人不可先有此心耳譬如衡之為
器本所以平物也今若先有一物在上則又如何稱頃之復
曰要之這原頭却在那致知上知至而意識則如好好色如
惡惡臭好者端的是好惡者端的是惡其常云此處是學者
一箇關過得此關方始是實又曰其嘗謂此一節甚異若知
不至則方說惡不可作又有一箇心以為為之亦無害以為
善不可不為又有一箇心以為不為亦無緊要譬如草木從
下面生出一箇芽子這便是不能純一這便是知不至之所
為或問公私之別曰今小譬之譬如一事若係公衆便心下
不大段管若係私已便只管橫在胸中念念不忘只此便是
公私之辨 道夫

忿懣好樂恐懼憂患這四者皆人之所有不能無然有不得其

正者只是應物之時不可夾帶私心如有一項事可喜自家
正喜喜焉見一可怒底事來是當怒底事却以這喜心處之和
那怒底事也喜了便是不得其正可怒事亦然惟誠其意真
箇如鑑之空如衡之平妍媸高下隨物定形而我無與焉這
便是正心因說前在漳州見屬官議一事數日不決却是有
所挾後忽然看破了道這箇事不可如此一向判一二百字
盡皆得這意思此是因事上見這心親切賀孫錄別出

先之問心有所好樂則不得其正曰心在這一事不可又夾帶
那一事若自家喜這一項事了更有一事來便須放了前一
項只平心就後一項理會不可又夾帶前喜之之心在這裏
有件喜事不可因怒心來忘了所當喜處有件怒事不可因
喜事來便忘了怒且如人合當行大門出却又有些回避底
心夾帶在裏面却要行便門出雖然行向大門出念念只有
箇行便門底心在這裏少刻或自拗向便門去學者到這裏

須是便打殺那要向便門底心如何不會端正這般所在
多是因事見得分明前在漳州有一公事合恁地直截斷緣
中間情有牽制被他撓數日忽然思量透便斷了集同官看
覺當時此心甚正要知此正是正心處賀孫

敬之問正心章云人之心要當不容一物曰這說便是難纔說
不容一物却又似一向全無相似只是這許多好樂恐懼忿
懣憂患只要從無處發出不可先有在心下看來非獨是這
幾項如此凡是先安排要恁地便不得如人立心要恁地嚴
毅把捉少間只管見這意思到不消恁地處也恁地便拘逼
了有人立心要恁地慈祥寬厚少間只管見這意思到不消
恁地處也恁地便流入於姑息苟且如有心於好名遇着近
名底事便愈好之如有心於為利遇着近利底事便貪欲續
人心如一箇鏡先未有一箇影象有事物來方始照見妍醜若
先有一箇影象在裏如何照得人心本是湛然虛明事物之

來隨感而應自然見得高下輕重事過便當依前恁地處方得若事未來先有一箇忿懣好樂恐懼憂患之心在這裏及忿懣好樂恐懼憂患之事到來又以這心相與交合便失其正事了又只苦留在這裏如何得正賀孫

葉兄又問忿懣章曰這心之正却如秤一般未有物時秤無不平纔把一物在上面便不平了如鏡中先有一人在裏面了別一箇來便照不得這心未有物之時先有箇主張說道我要如何處事纔遇着事便以是心處之便是不正且如今人說我做官要抑強扶弱及遇着當強底事也去抑他這便也是不正卓

喜怒哀懼惟都是人合有底只是喜所當喜怒所當怒便得其正若欲無這喜怒哀懼而後可以為道則無是理小人便只是隨這喜怒哀懼去所以不好了義剛

問忿懣章曰只是上下有不恰好處便是偏可學

問忿懣曰是怒之甚者又問忿懣比恐懼憂患好樂三者覺得忿懣又類過於怒者曰其實也一般古人既如此說也不須如此去尋討履務

問喜怒哀懼人心所不能無如忿懣乃戾氣豈可有也曰忿又重於怒心然此處須看文勢大意但此心先有忿懣時這下面便不得其正如鏡有人形在裏面第二人來便照不得如秤子釘盤星上加一錢則稱一錢物便成兩錢重了心若先有怒時更有當怒底事來便成兩分怒了有當喜底事來又減却半分喜了先有好樂也如此先有憂患也如此若把忿懣做可疑則下面憂患好樂等皆可疑問八章謂五者有當然之則如教情之心則豈可有也曰此處亦當看文勢大意教情只是一般人所為得人厭棄不起人敬畏之心若把教情做不當有則親愛敬畏等也不當有謝○寓

劉圻父說正心章謂不能存之則四者之來反動其心曰是當

初說時添了此一節若據經文但是說四者之來便撞翻了這坐子耳又曰只爭箇動不動又曰若當初有此一節時傳文須便說在那裏了他今只恁地說便是無此意却是某於解處說絮着這些子義剛

今不是就靜中動將去却是就第二重動上動將去如忿懣好樂之類德明

敬之問心有所好樂則不得其正章云心不可有一豪偏倚纔有一豪偏倚便是私意便浸淫不已私意反大似身已所以視而不見聽而不聞食而不知其味曰這下是說心不正不可以脩身與下章身不脩不可以齊家意同故云莫知其子之惡莫知其苗之碩視聽是就身上說心不可有一物外面酬酢萬變都只是隨其分限應去都不關自家心事纔係於物心便爲其所動其所以係於物者有三或是事未來而自家先有這箇期待底心或事已應去了又却長留在習中不

能忘或正應事之時意有偏重便只見那邊重這都是爲物所係縛既爲物所係縛便是有這箇物事到別事來到面前應之便差了這如何會得其正聖人之心瑩然虛明無纖毫形迹一看事物之來若小若大四方八面莫不隨物隨應此心元不曾有這箇物事且如敬以事君之時此心極其敬當時更有親在面前也須敬其親終不成說敬君但只敬君親便不須管得事事都如此聖人心體廣大虛明物物無遺續正叔見先生言明心定心等說因言心不在焉則視而不見聽而不聞食而不知其味曰這箇二歲孩兒也道得八十翁翁行不得伯羽

黃丈云舊嘗問視而不見聽而不聞只是說知覺之心却不及義理之心先生曰才知覺義理便在此才昏便不見了方學

直卿云舊嘗問視而不見聽之不聞處此是收拾知覺底心收蒙錄

拾義理底心先生曰知覺在義理便只是有深淺學蒙

夜來說心有喜怒不得其正如某夜間看文字要思量改甚處

到上床時擦脚心都忘了數天明擦時便記得蓋是早間未

有一事上心所以記得孟子說平旦之氣其好惡與人相近

者幾希幾希不遠也言人都具得此但平日不曾養得猶於

夜間歇得許多時不接於事天明方惺便恁地虛明光靜然

亦只是此子發出來少間又被物欲枯亡了孟子說得話極

齊整當對如這處他一向說後去被後人來就幾希字下注

開了便覺意不連賀孫

問誠意正心二段只是存養否曰然寓

說心不得其正章曰心全德也欠了此箇德便不全故不得其

正又曰心包體用而言又問意思與情如何曰欲為這事是意

能為這事是情子蒙

傳八章釋脩身齊家

忿懣恐懼好樂憂患皆不能無而親愛畏敬哀矜教情賤惡亦

有所不可無者但此心不為四者所動乃得其正而五者皆

無所偏斯足以為身之脩也人傑

或問正心章說忿懣恐懼好樂憂患脩身章說親愛賤惡畏敬

哀矜教情如何曰是心卓然立乎此數者之外則平正而不

偏僻自外來者必不能以動其中自內出者必不至於溺於

彼或問畏敬如何曰如家人有嚴君焉吾之所當畏敬者也

然當不義則爭之若過於畏敬而從其令則陷於偏矣若夫

賤惡者固當賤惡然或有長處亦當知之下文所謂好而知

其惡惡而知其美者天下鮮矣此是指點人偏處最切當人

心須卓立在八九者之外謂忿懣而勿陷於八九者之中方得

其正聖人之心周流應變而不窮只為在內而外物入不得

及其出而應接又不陷於彼夔孫

問七章八章頗似一意如何曰忿懣之類心上理會親愛之類

事上理會心上理會者是見於念慮之偏事上理會者是見於事為之失去偽

正卿問大學傳正心脩身莫有深淺否曰正心是就心上說修身是就應事接物上說那事不從心上做出來如修身如繫矩都是心做得出但正心是萌芽上理會若修身及繫矩等事却是各就地頭上理會格

問正心章既說念慮四者脩身章又說之其所親愛之類如何曰念慮等是心與物接時事親愛等是身與物接時事廣

正心脩身今看此段大槩差錯處皆未在人欲上這箇皆是人合有底事皆恁地差錯了况加之以放辟邪侈分明是官街上錯了路賀孫

子升問脩身齊家章所謂親愛畏敬以下說凡接人皆如此不特是一家之人否曰固是問如何脩身却專指待人而言曰脩身以後大槩說向接物待人去又與只說心處不同要之

根本之理則一但一節說闊一節去木之

第八章人謂眾人之猶於也之其亦如於其人即其所向處泳之其所親愛之之猶往也銖

問大學譬音改僻如何曰只緣人心有此偏僻問似此恐於脩身在正其心處相類否曰略相似萬

問古注辟作譬似窒礙不通曰公亦疑及此某正以他說之其所教情而譬焉教情非美事如何譬得故今只作僻字說便通况此篇自有僻字如辟則為天下僂矣之類是也大雅

親愛賤惡畏敬哀矜教情各自有當然之則只不可偏如人飢而食只合當食食纔過此子便是偏渴而飲飲才過此子便是偏如愛其人之善若愛之過則不知其惡便是因其所重而陷於所偏惡惡亦然下面說人莫知其子之惡莫知其苗

之碩上面許多偏病不除必至於此泳人之其所親愛而僻焉如父子是當主於愛然父有不義子不

可以不爭如爲人父雖是止於慈若一向僻將去則子有不肖亦不知責而教焉不可人之其所賤惡而僻焉人固自有
一種可厭者然猶未至於可賤惡處或尚可教若一向僻將
去便賤惡他也不得人之所畏敬而僻焉如事君固是畏敬
然說大人則藐之又不甚畏敬孟子此語雖稍龐然古人正
救其惡與陳善開邪責難於君也只管畏敬不得賀孫

問齊家段辟作僻曰人情自有偏處所親愛莫如父母至於父
母有當幾諫處豈可以親愛而忘正救所敬畏莫如君父至
於當直言正諫豈可專持敬畏而不敢言所教情處如見那
人非其心之所喜自懶與之言即是忽之之意問教隨惡德
也豈君子宜有曰讀書不可泥且當看其大意縱此語未穩
亦一兩字失耳讀書專留意小處失其本領所在最不可寓
問章句曰人於五者本有當然之則然教之與情則氣習之所
爲實爲惡德至若哀矜之形正良心苗裔偏於哀矜不失爲

仁德之厚又何以爲身不脩而不可以齊其家者乎曰教情
謂如孔子之不見孺悲孟子不與王驪言哀矜謂如有一般
大姦大惡方欲治之被他哀鳴慳告却便恕之道夫云這只
是言流爲姑息之意曰這便是哀矜之不得其正處道夫

或問之其所教情而辟焉曰親者則親愛之賢者則畏敬之不
率者則賤惡之無告者則哀矜之有一般人非賢非親未見
其爲不率又不至於無告則是泛然沒緊要底人見之豈不
教情雖聖賢亦有此心然亦豈可一向教情他一向教情便
是僻了畏敬親愛賤惡哀矜莫不皆然故下文曰愛而知其
惡惡而知其美如所教情之人又安知其無善之可愛敬所
謂教情者只是闊略過去高

問教情曰大抵是一種沒要緊底半上落下底人且如路中撞
見如此等人是不足親愛畏敬者不成強與之相揖而致其
親愛畏敬教情是人之所不能無者又問教情二字恐非好

事曰此如明鑑之懸妍者自妍醜者自醜隨所來而應之不
成醜者至前須要換作妍者又教情是輕賤惡是重既得賤
惡如何却不得教情然聖人猶戒其僻則又須點檢不可有
過當處履孫

蔡問教情之說曰有一般人上未至於可親愛下未至於可賤
惡只是所為也無甚好處令人懶去接他是謂教情此教情
不是惡德淳○文蔚錄云非如常人傲忽
情慢只是使人見得他懶此

或問教情是凶德而曰有當然之則何也曰古人用字不如此
教情未至可賤可惡但見那一等沒緊要底人自是恁地然
一向去教情他也不可如此

問君子亦有教情於人者乎曰人自有苟賤可厭弃者德明

問教情曰教便是情教了便情教了都不管他便是情義剛

因學者問大學教情處而曰其嘗說如有人問易不當為卜筮
書詩不當去小序不當叶韻反大學教情處皆在所不答個

或問之其所親愛哀矜田及敬而辟焉莫是君子用心過於厚否

曰此可將來觀過知仁處說不可將來此說蓋不必論近厚
近薄大抵一切事只是才過便不得觀過知仁乃是因此是
其用心之厚故可知其仁然過則終亦未是也大凡讀書須
要先識認本文是說箇甚麼須全做不會識他相似虚心認
他字字分明復看數過自然會熟見得分明譬言如與人乍相
見其初只識其面目再見則可以知其姓字鄉貫又再見則
可以知其性行如何只恁地識認以後便一見理會得今學
者讀書亦且未要便懸空去思他中庸云博學之審問之方
言謹思之若未學未問便去思他是空勞心耳又云切須記
得識認兩字時舉

問大學釋脩身齊家章不言脩身何也曰好而不知其惡惡而

不知其美是以好為惡以曲為直可謂之脩身乎節

大學最是兩章相接處好看如所謂脩身在正其心者且如心

不得其正則視而不見聽而不聞食而不知其味若視而見聽而聞食而知味則心得其正矣然於親愛敬惰五者有所僻焉則身亦不可得而脩矣嘗謂脩身更多少事不說却說此五者何謂子細看來身之所以不脩者無不是被這四五箇壞又云意有不誠時則私意為主是主人自爲賊了到引惹得外底人來四方八面無關防處所以要得先誠其意子欲脩其身者先正其心欲正其心者先誠其意欲誠其意者先致其知致知在格物五者其實則相串而以做功夫言之則各自爲一事故物格而後知至知至而後意誠意誠而後心正心正而後身脩著而字則是先爲此而後能爲彼也蓋逐一節自有一節功夫非是僮侗言知至了意便自誠意誠了心便自脩中間更不着功夫然但只是上面一截功夫到了則下面功夫亦不費力耳先生曰亦有天資高底人只頭正了便都正去若夾雜多底也不能如此

端蒙

問正心脩身章後注云此亦當通上章推之蓋意或不誠則無能實用其力以正其心者云云曰大學所以有許多節次正欲學者逐節用上非如一無節之竹使人繞能格物則便到平天下也夫人蓋有意誠而心未正者蓋於忿懣恐懼等事誠不可不隨事而排遣也蓋有心正而身未脩者故於好惡之間誠不可不隨人而節制也至於齊家以下皆是教人節節省察用功故經序但言心正者必自誠意而來脩身者必自正心而來非謂意既誠而心無事乎正心既正而身無事乎脩也且以大學之首章便教人明明德又爲格物以下事目皆爲明明德之事也而平天下方且言先謹乎德等事亦可見矣

壯祖

大學如正心章已說盡了至脩身章又從頭說起至齊家治國章又依前說教他何也蓋要節節去照管不成却說自家在這裏心正身脩了便都只聽其自治

夔孫

說大學誠意章曰如今人雖欲為善又被一箇不欲為善之意來妨了雖欲去惡又被一箇尚欲為惡之意來妨了蓋其知之不切故為善不是他心肯意肯去惡亦不是他心肯意肯這箇便是自欺便是不誠意纔不誠則心下便有許多忿懣恐懼憂患好樂而心便不正心既不正則凡有愛惡等事莫不倚於一偏如此如何要家齊國治天下平惟是知得切則好善必如好好色惡惡必如惡惡臭是非為人而然蓋胸中實欲如此而後心滿意懌賀孫

傳九章釋家齊國治

或問齊家一段是推將去時較切近否曰此是言一家事然而自此推將去天下國家皆只如此又問所畏敬在家中則如何曰一家之中尊者可畏敬但是有不當處亦含有幾諫時不可道畏敬之便不可說着若如此唯知畏敬却是辟也祖道或問不出家而成教於國曰孝以事親而使一家之人皆孝弟

以事長而使一家之人皆弟慈以使眾而使一家之人皆慈是乃成教於國者也人傑

李德之問不出家而成教於國不待推也曰不必言不待推玩其文義亦未嘗有此意只是身脩於家雖未嘗出而教自成於國爾蓋卿

孝者所以事君弟者所以事長慈者所以使眾此道理皆是我家裏做成了天下人看着自能如此不是我推之於國也

劉潛夫問齊家章並言孝弟慈三者而下言康誥以釋使眾一句不及孝弟何也曰孝弟二者雖人所固有然守而不失者亦鮮唯有保赤子一事罕有失之者故聖賢於此特發明夫人之所易曉者以示訓正與孟子言見赤子入井之意同此心誠求之者求赤子之所欲也於民亦當求其有不能自達此是推其慈幼之心以使眾也節

問治國在齊其家曰且只說動化為功未說到推上後章方至

是說推如保赤子一節只是說慈者所以使衆一句保赤子慈於家也如保赤子慈於國也保赤子是慈如保赤子是使衆直卿云這箇慈是人人自然有底慈於家便能慈於國故言一家仁一國興仁一家讓一國興讓寓

一家仁以上是推其家以治國一家仁以下是人自化之也問九章本言治國何以曰堯舜率天下以仁而民從之都是說治天下之事也至言君子有諸己而後求諸人無諸己而後非諸人又似說脩身如何曰聖人之言簡暢周盡脩身是齊家之本齊家又治國之本如言一家仁一國興仁一家讓一國興讓之類自是相關豈可截然不相入也黷同去

問有諸己而後求諸人曰只從頭讀來便見得分曉這箇只是躬自厚而薄責於人改其惡無攻人之惡卓

問有諸己而後求諸人雖曰推己以及人是亦示人以反己之道曰這是言己之爲法於人處道夫

真仁甫問有諸己而後求諸人無諸己而後非諸人曰此是退一步說猶言温故知新而可以爲人師以明未能如此則不

可如此非謂温故知新便要求爲人師也池本不可下云爲人師耳若曰有諸己而後非諸人以明無諸己不可求諸人也無諸己而後非諸人以明有諸己即不可非諸人也然此意正

爲治國者言大凡治國禁人爲惡而欲人爲善便求諸人非諸人然須是在己有善無惡方可求人非人也或問范忠宣

以恕己之心恕人此語固有病但上文先言以責人之心責己則連下句亦未害曰上句自好下句自不好蓋才說恕己

便己不是若橫渠云以愛己之心愛人則盡仁以責人之心責己則盡道語便不同蓋恕己與愛己字不同大凡知道者

出言自別近觀聖賢言語與後世人言語自不同此學者所以貴於知道也錄

有諸己而後求諸人無諸己而後非諸人是責人之恕恕與己所不欲勿施於人是愛人之恕又曰推己及物之謂恕聖

人則不待推而發用於外者皆恕也已所不欲勿施於人則就愛人上說聖人之恕則不專在愛人上見如絜矩之類是也高

問所藏乎身不恕處恕字還只就接物上說如何曰是就接物上見得忠只是實心直是真實不偽到應接事物也只是推這箇心去直是忠方能恕若不忠便無本領了更把甚麼去及物程子說維天之命於穆不已忠也便是實理流行乾道變化各正性命恕也便是實理及物守約問恁地說又與夫子之道忠恕而已矣之忠恕相似曰只是一箇忠恕豈有二樣聖人與常人忠恕也不甚相遠又曰盡已不是說盡五身之實理自盡便是實理此處加思若有此子未盡處便是不實如欲為孝雖有七分孝只中間有三分未盡固是不實雖有九分孝一作弟只略略有一分未盡亦是不實賀孫

李德之問齊家治國平天下三章看來似皆是恕之功用曰如治國平天下兩章是此意治國章乃責人之恕平天下章乃愛人之恕齊家一章但說人之偏處蓋卿

仁甫問治國在齊其家曰這箇道理却急迫不得待到他日數足處自然通透這箇物事只是看得熟自然有條理上面說不出家而成教於國此下便說其所以教者如此這三者便是教之目後面却是說須是躬行方會化得人此一段只此兩截如此賀孫

因講禮讓為國曰一家仁一國興仁一家讓一國興讓自家禮讓有以感之故民亦如此興起自家好爭利却責民間禮讓如何得他應東坡策別敦教化中一段說得也好雖說得籠道理却是如此敦教化云鈔民之知信義莫若務去其貪云云看道理不要玄妙只就履處說得出便是如今官司不會制民之產民自去買田又取他牙稅錢古者羣飲者殺今置官誘民飲

酒惟恐其不來如何得民興於善淳

問齊家治國之道斷然是父子兄弟足法而後人法之然堯舜不能化其子而周公則上見疑於君下不能和其兄弟是如何曰聖人是論其常堯舜是處其變看他丞丞又不格姦至於瞽瞍底豫便是他有以處那變處且如他當時被那兒子恁地他處得好不將天下與兒子却傳與賢便是他處得那兒子好若堯當時把天下與丹朱舜把天下與商均則天下如何解安他那兒子如何解寧貼如周公被管蔡恁地他若不去致辟于商則周如何不擾亂他後來盡死做這一着時也是不得已着恁地但是而今且去理會常倫而今如何便解有箇父如瞽瞍有箇兄弟如管蔡未論到那變處賀孫

傳十章釋治國平天下

或問大學既格物致知了又却逐件各有許多工夫在曰物格知至後其理雖明到得後來齊家治國平天下逐件事又自

有許多節次須逐件又徐徐做將去如人行路行到一處了又行一處先來固是知其所往了到各處又自各有許多行步若到一處而止不進則不可未到一處而欲踰越頓進一處亦不可瑤

味道問平天下在治其國曰此節見得上行而下效又見得上下雖殊而心則一道夫

問平天下在治其國章曰此三節見上行下效理之必然又以見人心之所同是以君子有絜矩之道所以以己之心度人之心使皆得以自盡其興起之善心若不絜矩則雖躬行於上使彼有是興起之善心而不可得遂亦徒然也又曰因何恁地上行下效蓋人心之同然所以絜矩之道我要恁地也使彼有是心者亦得恁地全章大意只反覆說絜矩如專利於上急征橫斂民不得以自養我這裏雖能興起其善心濟甚事若此類皆是不能絜矩賀孫

才卿問上老老而民興孝恐便是連那老衆人之老說曰不然此老老長長恤孤方是就自家身上切近處說所謂家齊也民興孝與弟不倍此方是就民之感發興起處說治國而國治之事也緣爲上行下效捷於影響可以見人心之所同者如此是以君子必有絜矩之道也此一句方是引起絜矩事下面方解說絜矩而結之云此之謂絜矩之道蓋人心感發之同如此所以君子須用推絜矩之心以平天下此幾多分曉若如才卿說則此便是絜矩何用下面更絮說許多才卿不合誤曉老老長長爲絜矩所以差也所謂文王之民無凍餒之老者此皆是絜矩已後事如何將做老老說得個老老興孝長長興弟恤孤不倍這三句是說上行下效底道理是以君子有絜矩之道這却是說到政事上是以二字是結上文猶言君子爲是之故所以有絜矩之道既恁地了却須處置教他得所使之各有以遂其興起之心始得

所謂絜矩者矩者心也我心之所欲即他人之所欲也我欲孝弟而慈必欲他人皆如我之孝弟而慈不使一夫之不獲者無一夫不得此理也只我能如此而他人不能如此則是不平矣人傑

問絜矩之道語脉貫穿如何久思未通上面說人心之所同者既如此是以君子見人之心與己之心同故必以己度人之心使皆得其平下面方說所以絜矩如此賀孫問上老老而民興孝下面接是以君子有絜矩之道也似不相續如何曰這箇便是相續絜矩是四面均平底道理教他各得老其老各得長其長各得幼其幼不成自家老其老教他不得老其老長其長教他不得長其長幼其幼教他不得幼其幼便不得寓

仁甫問絜矩曰上之人老老長長恤孤則下之人興孝興弟不倍此是說上行下效到絜矩處是就政事上言若但興起其

善心而不有以使之得遂其心則雖能興起終亦徒然如政
煩賦重不得以養其父母又安得以遂其善心須是推己之
心以及於彼使之仰足以事父母俯足以育妻子方得如詩
裏說大夫行役無期度不得以養其父母到得使下也須教
他內外無怨始得如東山出車杖杜諸詩說行役多是序其
室家之情亦欲使凡在上者有所感動又曰這處正如齊宣
王愛牛處一般見牛之觶觶則不忍之心已形於此若其以
釁鍾爲不可廢而復殺之則自家不忍之心又只是空所以
以羊易之則已形之良心不至於空塞而未見之羊殺之亦
無害是乃仁術也術是做得巧處謂之術又曰已欲立而立
人已欲達而達人兩摺說只以已對人而言若絜矩上之
人所以待己已又所以待人是三摺說如中庸所求乎子以
事父未能也所求乎臣以事君未能也一類意又曰晁錯言
人情莫不欲壽三王能生之而不傷云云漢詔云云孝心關

焉皆此意

賀孫

問絜矩一條此是上下四方度量而知民之好惡否曰知在前
而後是推老老而民興孝長長而民興弟恤孤而民不倍
這處便已知民之好惡與己之好惡相似是以君子有絜矩
之道便推將去緊要在母以字上又曰興謂興起其善心遂
謂成遂其事又曰爲國絜矩之大者又在於財用所以後而
只管說財如今茶鹽之禁乃是人生日用之常却反禁之這
箇都是不能絜矩

賀孫

上老老而民興孝是化絜矩處是處置功用處

振

問絜矩之道曰能使人興起者聖人之心也能遂其人之興起
者聖人之政事也廣

平天下謂均平也所惡於上毋以使下所惡於下毋以事上此
與中庸所謂所求乎臣以事君未能者同意但中庸是言其
所好者此言其所惡者也問前後左右何指曰譬如交代官

相似前官之待我者既不善吾母以前官所以待我者待後
政也左右如東鄰西鄰以鄰國為壑是所惡於左而以交於
右也俗語所謂將心比心如此則各得其平矣問章句中所
謂絜矩之道是使之各得盡其心而無不平也如何曰此是
推本上老老而民興孝上長長而民興弟上恤孤而民不倍
須是留那地位使人各得自盡其孝弟不倍之心如八十者
其家不從政廢疾非人不養者一子不從政是使其各得自
盡也又如生聚蕃息無令父子兄弟離散之類德明

所惡於上所惡於下所惡於前所惡於後所惡於右所惡於左
此是句皆是就人身切近處說如上文老老長長恤孤之意至於母以使
下母以事上母以先後母以從前母以交於左右以交於右

方是推以及物之事憫

問絜矩曰只把上下前後左右等句看便見絜度也不是真把
那矩去量度只是自家心裏暗度那箇長那箇短所謂度長

絜大上下前後左右都只一樣心無波己之異只是將那頭
折轉來比這頭在我之上者使我如此而我惡之則知在我
下者心亦似我如此故更不將所責上底人之心來待下人
如此則自家在中央上面也占許多地步下面也占許多地
步便均平正方若將所責上底人之心來待下便上面長下
面短不方了下之事我如此而我惡之則知在我之上者心
亦似我如此若將所責下底人之心更去事上便又下面長
上面短了左右前後皆然待前底心便折轉來待後待左底
心便折轉來待右如此便方每事皆如此則無所不平矣寓
所謂絜矩者如以諸侯言之上有天子下有大夫天子擾我使
我不得行其孝悌我亦當察此不可有以擾其大夫使大夫
不得行其孝悌且如自家有一丈地左家有一丈地右家有
一丈地左家侵着我五尺地是不矩我必去訟他取我五尺
我若侵着右家五尺地亦是不矩合當還右家只是我也方

上也方下也方左也方右也方前也方後也方不相侵越如
伐冰之家不畜牛羊亞夫云務使上下四方一齊方不侵過
他人地步曰然節

或問絜矩曰譬之如左邊有一人侵我地界是他不是了我又
不可去學他侵了右邊人底界前人行擁住我我行不得我
又不可學他擁了後人後人趕逐我不了又不可學他去趕
前人上下亦然椿云此一人却是中立也曰是椿

絜矩如自家好安樂便思他人亦欲安樂當使無老稚轉乎溝
壑壯者散而之四方之患制其田里教之樹畜皆自此以推
之闕祖

問論上下四旁長短廣狹彼此如一而無不方在矩則可以如
此在人則有天子諸侯大夫士庶人之分何以使之均平曰
非是言上下之分欲使之均平蓋事親事長當使之均平上
下皆得行上之人得事其親下之人也得事其親上之人

得長其長下之人也得以事其長節

問絜矩六節如所惡於上無以使下及左右前後常指三處上
是一人下是一人我居其中故解云如不欲上之無禮於我
則我亦不以無禮使其下其下五節意皆類此先生曰見曾
子之傳發明恕字上下四旁無不該也過

恕亦是絜矩之意振

陶安國問絜矩之道是廣其仁之用否曰此乃求仁工夫此處
正要着力若仁者則是舉而措之不待絜矩而自無不平者
矣銖曰仁者則已欲立而立人已欲達而達人待推矣若
絜矩正恕者之事也先生領之銖

德元問我不欲人加諸我吾亦欲無加諸人與絜矩同否曰然
但子貢所問是對彼我說只是兩人絜矩則是三人爾後世
不復知絜矩之義惟務竭民財以自豐利自一孔以上官皆
取之故上愈富而下愈貧夫以四海而奉一人不為不厚矣

使在上者常有厚民之心而推與共之猶慮有不獲者况皆不卹而惟自封殖則民安得不困極乎易損上益下曰益損下益上曰損所以然者蓋邦本厚則邦寧而君安乃所以益也否則反是個

李文問盡得絜矩是仁之道恕之道曰未可說到那裏且理會絜矩是如何問此是我不欲人之加諸我吾亦欲無加諸人意思否曰此是兩人須把三人看便見人莫不有在我之上者莫不有在我之下者如親在我之上子孫在我之下我欲子孫孝於我而我却不能孝於親我欲親慈於我而我却不能慈於子孫便是一畔長一畔短不是絜矩寓

絜矩非是外面別有箇道理只是前面正心脩身推而措之又

不是其他機巧變詐權謀之說賀孫

絜矩之說不在前數章却在治國平天下之後到這裏也是節次成了方用得道夫

君子先慎乎德一條德便曰正明德之德自家若意誠心正身脩家齊了則天下之人安行不歸於我如湯武之東征西怨則自然有人有土賀孫

或問爭鬪其民而施以劫奪之教曰民本不是要如此惟上之人以德爲外而急於貨財暴征橫斂民便效尤相攘相奪則是上教得他如此賀孫

或問爭民施奪曰是爭取於民而施之以劫奪之教也媚疾以惡之是徇其好惡之私節

斷斷者是絜矩媚疾者是不能唯仁人放流之是大能絜矩底人見賢而不能舉舉而不能先是稍能絜矩好人之所惡者是大不能絜矩節

舉而不能先是早底意思不能速用之意味

君子有大道必忠信以得之驕泰以失之平天下一章其事如此廣闊然緊要處只在這此子其粗說不過如此若細說則

如操則存克已復禮等語皆是也

趙唐卿問十章三言得失而章句云至此而天理存亡之機決矣何也曰他初且言得眾失眾再言善不善意已切矣終之以忠信驕泰分明是就心上說出得失之由以決之忠信乃天理之所以存驕泰乃天理之所以亡

問仁者以財發身曰不是特地散財以取名買教人來奉己只是不私其有則人自歸之而身自尊只是言其散財之效如此賀孫

仁者以財發身但是財散民聚而身自尊不在於財不仁者只管多聚財不管身之危亡也

蜚卿問未有好仁而下一不好義如何上仁而下便義曰這只是一箇在上便喚做仁在下便喚做義在父便謂之慈在子便謂之孝直卿云也如孝慈則忠曰然道夫

雖有善者善如而今說會底

閱祖

國不以利為利如秦發閭左之戍也是利墮名城殺豪傑銷鋒鏑北築長城皆是自要他利利不必專指財利所以孟子從頭截斷只說仁義說到未有仁而遺其親未有義而後其君這裏利却在裏面所以說義之所安即利之所在蓋惟義之安則自無不利矣

問末章說財處太多曰後世只此一事不能與民同

可吝

第九章十章齊家治國既已言化平天下只言措置之理絜度也矩所以為方也方者如用曲尺為方者也何謂是以君子有絜矩之道上面人既自有孝弟下面民亦有孝弟只要使之自遂其孝弟之心於其下便是絜矩若拂其良心重賦橫斂以取之使他不得自遂其心便是不方左右前後皆然言是以者須是如此後面說民之父母所好所惡皆是要與民同利之一字且如食祿之家又畜雞豚牛羊却是與民爭利便是不絜矩所以道必義為利者義以方外也

問繫矩以好惡財用媚疾彥聖為言何也曰如桑弘羊聚許多財以奉武帝之好若是繫矩底人必思許多財物必是侵過着民底滿得我好民必惡言財用者蓋如自家在一鄉之間却專其利便是侵過着他底便是不繫矩言媚疾彥聖者蓋有善人則合當舉之使之各得其所今則不舉他便失其所是侵善人之分便是不繫矩此特言其好惡財用之類當繫矩事事亦當繫矩節

問自致知至於平天下其道至備其節目至詳至悉而反覆於終篇者乃在於財利之說得非義利之辨其事尤難而至善之止於此尤不可不謹故不然則極天命人心之向背以明好惡從違之得失其丁寧之意何其至深且切邪曰此章大槩是專從繫矩上來蓋財者人之所同好也而我欲專其利則民有不得其所好者矣大抵有國有家所以生起禍亂皆是從這裏來道夫云古注繫音戶結反云結也曰作結字解

亦自得蓋荀子莊子注云繫圍束也是將一物圍束以為之則也又曰某十二三歲時見范文所言如此他甚自喜以為先儒所未嘗到也道夫

或問繫矩之義如何只說財利曰必竟人為這箇較多所以生養人者所以殘害人者亦只是這箇且如今官司皆不是繫矩自家要賣酒便教人不得賣酒自家要權鹽便教人不得賣鹽但事勢相迫行之已久人不為惟其實理不如此學家因論治國平天下章財用處曰財者人之所好自是不可獨占須推與民共之未論為天下且以作一縣言之若寬其賦斂無征誅之擾民便歡喜愛戴若賦斂稍急又有科敷之擾民便生怨決然如此又曰寧過於予民不可過於取民且如一鄉若屑屑與民爭利便是傷廉若饒潤人些子不害其為厚孟子言可以取可以無取取傷廉可以與可以無與與傷惠他主意只是在取傷廉上且將那與傷惠來相對說其實

與之過厚此子不害其爲厚若纔過取便傷廉便不好過與必竟當下是好意思與了再看之方見得是傷惠與傷廉不同所以子華使於齊冉子與之粟五秉聖人雖說他不是然亦不大故責他只是纔過取便深惡之如冉求爲之聚斂而欲攻之是也備

問平天下章言財用特詳當是民生日用最要緊事耳曰然蓋子首先所言其原出此子升問此章所言反覆最詳之意曰要之始終本末只一理但平天下是一件最大底事所以推廣說許多如明德新民至善之理極精微至治國平天下只就人情上區處又極平易蓋至於平而已耳後世非無有志於天下國家之人却只就末處布置於本原上全不理會因言莊子不知他何所傳授却自見得道體蓋自孟子之後荀卿諸公皆不能及如說話道而非其序非道也此等議論其好度亦須承接得孔門之徒源流有自後來佛氏之教有說

得好處皆出於莊子但其知不至無細密工夫少間都說得流了所謂賢者過之也今人亦須自理會自家本領通貫却去看他此等議論自見得高下分曉若一向不理會得他底破少間却有見識低似他處因說曾點之徒氣象正如此又問論語集注說曾點是雖堯舜事業亦優爲之莫只是堯舜事業亦不足以芥蒂其心否曰堯舜事業也只是這箇道理又問他之所爲必不中節曰本領處同了只是無細密工夫未之

入治一家一國尚且有照管不到處况天下之大所以反反覆覆說不是大着箇心去理會如何照管得泳

二
冊
九

卷
十
六

四
五

大正

